



27. Januar 2015

UPA15/123

Inatsisartut Suleriaasianni § 36 innersuussutigalugu apeqquteqaat allaavigalugu Inatsisartuni oqallisissiamik siunnersuut imaattoq saqqummiuppara:

Allaffissornikkut ingerlatsiviup atugarisai aqqissugaaneralu pillugit apeqquteqaat aallaavigalugu oqallisissiamik siunnersuut. Ullumikkut pisortaqarfeqarnikkut aqqissugaanerput nukissanik atuiffiulluarlunilu inuiaqatigiit angissusaannut kulturiannullu naleqqussagaava.

(Inatsisartunut ilaasortaq Naaja H. Nathanielsen, Inuit Ataqatigiit)

Oqallinnikkut matumuuna kissaatigivara Inatsisartut eqqarsaatigissagaat Nunatta ineriartornissaa sumut sammiveqassanersoq. Politikikkut sulinermi suliassat immikkoortulluunniit ataasiakkaat pimoorullugit sammilernissaat ajornanngitsuararsuuvoq. Kisianni aamma ilanneeriarluta pissutsit annertunerusut isummersorfigisariaqarpagut – inuiaqatigiit ineriartornerat ataatsimut isigalugu.

Ukiut arfinillit matuma siorna Namminersorneq eqqunneqarpoq – pissusiviusullu naapertorlugit Namminersorneq pillugu inatsit suli ukiorpassuarni atuuttussaavoq. Kisianni Nunatta ineriartoqqinnissaa eqqartoraangatsigu “namminersulernissaq” samminerungajuttarparput. Isumaqarpunga maannakkorpiaq pisut isummersorfiginissaat amigaataasoq – inuiaqatigiit nukittorsarumallugit maannakkorpiaq alloriarfigisinnaasagut amerlaqaat.

Inuit amerlasuut oqallisigisaqisaat tassaavoq allaffissornikkut ingerlatsinerput.

Arlalippassuartigut ujarorneqarpoq allaffissornikkut ingerlatsineq kalaalerpalaarnerusoq. Oqallinneq ajornakusoorpoq, tassami arlalitsigut pineqalersarput inuiaassuseq imaluunniit oqaatsit. Kisianni isumaqarpunga inuiaassutsimik pingaartitsineq pinngikkaluarlugu qulequtaq pillugu oqallilluarsinnaasugut.

Assersuutigalugu isumaqarpunga nunat allat aqutseriaasii issuaannarsimagigut, pisariaqartinneqaraluartumik eqqarsaatigeqqaarnagit naleqqussaqqaarnagillu. Nunat allat allaffissornikkut ingerlatsinerminnik aqqissuussisimaneri ajunngitsorpassuarnik oqaasissaqarfigineqarsinnaapput – kisianni taakkua ilarpassui innuttaasunik amerlanerujussuarnik sullissinissaq siunertaralugu aqqissuussaapput.

Immaqa uagut ullumerniit ajornannginnerusumik aqqissuussisinnaavugut, pitsaassuseq ajornerulersinngikkaluarlugu. Neriutigivara uagut politikkeritut tamanna pillugu siunnersuuteqarsinnaasugut pisuutitassarsinngikkaluarluta.

Oqallinnerup matuma siunertarinngilaa Nunatsinni atorfillit ilungersorlutik sulisut nikanarsarnissaat nittarsaatipilunnissaalluunniit. Akerlianilli tassaavoq Nunatsinni aqqissuussineq pillugu nutaamik eqqarsarnissamat kajumissaarut.

Tamanna pillugu partiit isummersuutaasa tusarnissaat qilanaarivara. Oqallilluarisi.